


Bosna i Hercegovina
Federacija Bosne i Hercegovine
Hercegovačko – neretvanski kanton
Fond za zaštitu okoliša



Bosnia & Herzegovina
Federation of Bosnia & Herzegovina
Herzegovina - Neretva Canton
Environmental Fund

P R A V I L N I K
O NAČINU PRAĆENJA NAMJENSKOG KORIŠTENJA SREDSTAVA
I UGOVORENIH PRAVA I OBAVEZA

Mostar, juli 2013. godine

Na osnovu člana 25. stava (4) Zakona o Fondu za zaštitu okoliša Hercegovačko – neretvanskog kantona („Službene novine HNK“, broj: 6/12) i člana 44. stav (1) tačka 8) Statuta Fonda za zaštitu okoliša Hercegovačko – neretvanskog kantona („Službene novine HNK“, broj: 9/12), Upravni odbor Fonda za zaštitu okoliša Hercegovačko – neretvanskog kantona, je na prijedlog direktora Fonda, na 3. sjednici održanoj dana 03.07.2013. godine, d o n i o

P R A V I L N I K O NAČINU PRAĆENJA NAMJENSKOG KORIŠTENJA SREDSTAVA I UGOVORENIH PRAVA I OBAVEZA

Član 1.

Ovim Pravilnikom uređuje se način praćenja namjenskog korištenja sredstava, koja Fond za zaštitu okoliša Hercegovačko – neretvanskog kantona (u daljem tekstu: Fond) odobrava za finansiranje pripreme, provedbe i razvoja programa, projekata i sličnih aktivnosti u području očuvanja, održivog korištenja, zaštite i unapređenja okoliša (u daljem tekstu: sredstva Fonda), te način praćenja ugovorenih prava i obaveza korisnika sredstava.

Član 2.

Pravna i fizička lica kojima su odobrena sredstva Fonda za provođenje programa, projekata, odnosno drugih aktivnosti (u daljem tekstu: korisnici sredstava), dužni su dodijeljena sredstva koristiti namjenski, na način i u rokovima utvrđenim ugovorom o korištenju sredstava Fonda.

Član 3.

- (1) Fond prati korištenje sredstava koja je dodijelio za projekte, programe i druge aktivnosti, te nadzire njihovo namjensko korištenje na osnovu ugovora o korištenju sredstava Fonda, zavisno o njihovoj primjeni.
- (2) Ugovor o korištenju sredstava Fonda mora sadržavati odredbe o načinu nadzora izvođenja projekata, o načinu i rokovima obavještanja Fonda, te o mjerama koje mogu nastupiti radi neispunjavanja ugovorenih obaveza i nenamjenskog korištenja sredstava Fonda.

Član 4.

Fond prati i namjensko korištenje sredstava Fonda i izvršenje ugovorenih prava i obaveza korisnika sredstava:

- neposrednim uvidom, putem ovlaštenog lica,
- na osnovu izvještaja i dokumentacije dostavljene od strane korisnika sredstava.

Član 5.

- (1) Namjensko korištenje sredstava Fonda i izvršenje prava i obaveza korisnika sredstava temeljem ugovora o korištenju sredstava Fonda za realizaciju programa i projekata zaštite okoliša, prate i nadziru nadležne službe Fonda.

- (2) Fond ima pravo u svako doba putem svojih ovlaštenih lica, nadzirati namjensko korištenje sredstava Fonda i izvršenje prava i obaveza korisnika sredstava iz ugovora o korištenju sredstava Fonda.
- (3) Ako se u postupku praćenja i nadzora nad namjenskim trošenjem sredstava Fonda i izvršavanjem ugovorenih prava i obaveza, utvrdi potreba za posebnim stručnim znanjima i iskustvima kojima Fond ne raspolaže, direktor Fonda može obavljanje navedene zadaće povjeriti jednom ili više stručnih lica, odnosno stručnoj organizaciji.
- (4) Kada ovlašteno lice Fonda obavlja neposredni uvid na mjestu izvođenja programa, projekata, odnosno slične aktivnosti koja je predmet ugovora o korištenju sredstava Fonda, korisnik sredstava je dužan tom licu omogućiti uvid u svu dokumentaciju u vezi s programom, projektom, odnosno aktivnošću koja se nadzire.

Član 6.

- (1) Korisnik sredstava je dužan Fondu dostavljati izvještaje o realizaciji programa, projekata, odnosno sličnih aktivnosti u rokovima utvrđenim ugovorom o korištenju sredstava.
- (2) Izvještaj iz stava (1) ovog člana obavezno sadrži:
 - opis izvršenih radova (zbirno i po fazama),
 - utrošena finansijska sredstva,
 - opis promjena u realizaciji projekata, programa, odnosno druge aktivnosti koje utječu na troškove realizacije,
 - naznaku poteškoća pri izvođenju programa, projekata, odnosno druge aktivnosti s operativnim planom za njihovo rješenje,
 - odstupanja od plana provedbe programa, projekata, odnosno drugih aktivnosti,
 - ostale podatke bitne za provedbu programa, projekata, odnosno drugih aktivnosti i izvršenje ugovorenih obaveza.
- (3) Izvještaje iz stava (1) ovog člana, provjerava ovlašteno lice, te nakon njegove ovjere daje nalog za plaćanje odobrenih sredstava korisniku sredstava.

Član 7.

Korisnik sredstava dužan je odmah obavijestiti Fond o sljedećim pitanjima:

- statusnim promjenama korisnika sredstava,
- promjeni lica ovlaštenog za zastupanje korisnika sredstava,
- nemogućnosti korisnika sredstava na ispunjenje ugovorom preuzetih finansijskih obaveza,
- namjeri promjene izvođača radova,
- nastupu nepredviđenih okolnosti koje utječu na tehnički, organizacijski ili finansijski dio provedbe programa, odnosno projekata,
- odstupanjima od plana izvođenja programa odnosno projekata, i razlozima za odstupanje,
- drugim okolnostima koje nalažu potrebu izmjene ugovora o korištenju sredstava Fonda.

Član 8.

- (1) Ako korisnik sredstava dodijeljena sredstva ne koristi na način i za namjene utvrđene ugovorom o korištenju sredstava, odnosno ne izvršava ugovorene obaveze, Fond će obustaviti dodjelu sredstava, a korisnik sredstava je dužan nenamjenski utrošena sredstva vratiti Fondu u roku od 15 dana od dana prijema pismenog zahtjeva za povrat, zajedno sa zakonskom zateznom kamatom tekućom od dana prijema sredstava pa do dana povrata sredstava na račun Fonda.
- (2) Fond je dužan u pisanoj formi tražiti povrat sredstava roku od 30 dana od dana utvrđivanja činjenica o nenamjenskom korištenju sredstava od strane korisnika sredstava.

Član 9.

- (1) Ovaj Pravilnik stupa na snagu davanjem saglasnosti od strane Ministarstva trgovine, turizma i zaštite okoliša HNK, a bit će objavljen u „Službenim novinama Hercegovačko – neretvanskog kantona“.

**Bosna i Hercegovina
Federacija Bosne i Hercegovine
Hercegovačko – neretvanski kanton
Fond za zaštitu okoliša Hercegovačko – neretvanskog kantona
UPRAVNI ODBOR**

**Broj: UO-____/13
Mostar, 03.07.2013. godine**

PREDSJEDNIK

Alisa Hajdarović